

ՎԱՀԱԳՆ ՀԱՐՈՒԹՅՈՒՆՅԱՆ

1909 Թ. ԿՈՏՈՐԱԾՆԵՐԸ ԵՒ ՄԵԾԻ ՏԱՆՆ ԿԻԼԻԿԻՈ ԿԱԹՈՂԻԿՈՍՈՒԹՅՈՒՆԸ

1890-ական թվականների արդուլհամիդյան կոտորածներին հաջորդեց արեւմտահայերի ձերբակալությունների, հալածանքների ու բռնությունների երկարատեւ մի շրջան, որը ոչ միայն չդադարեց 1908 թ. հուլիսին երիտթուրքական հեղաշրջման եւ օսմանյան սահմանադրության հռչակումով, այլ նաեւ շարունակվեց ու Ադանայի եւ Հալեպի նահանգների հայաբնակ տարածքներում (մասնավորապես՝ Ադանայում, Սսում (Գոզան), Ճեպել-Բերեքեթում, Տարսուսում, Օսմանիեում, Մերսինում, Հասան-Բելլիում եւ այլ վայրերում) 1909 թ. ապրիլին տեղի ունեցան ծրագրված ու կանխավ մտածված հրեշավոր ջարդեր:

Հիշենք, որ պատմական Ադանան գտնվում էր Դաշտային Կիլիկիայում՝ Սիհուն գետի աջ ափին՝ շրջապատված պարտեզներով: Այն կապված էր Միջերկրական ծովի հետ: Չնայած քաղաքի բնական պայմանները այսօր եւս նախկինի պես անբարենպաստ են, սակայն դարեր շարունակ Ադանան եղել է Կիլիկիայի ամենամեծ ու բազմամարդ բնակավայրը: Առաջին աշխարհամարտի նախօրյակին այն ուներ 60 000 բնակիչ, որի մոտ կեսը հայեր էին¹: Շնորհիվ քաղաքի շուրջ գտնվող բարեբեր հողատարածքների եւ գրաված աշխարհագրական դիրքի՝ Ադանան դարձել էր հարուստ քաղաք եւ Չուքուր Օվայի գյուղատնտեսական կարեւոր արվարձաններից մեկը: Քաղաքում զարգացած էին բամբակագործությունը, հողագործությունը, արհեստներն ու առեւտուրը²:

Մինչեւ ԺԹ. դ. Ադանան ուներ 12 եկեղեցի, որոնցից մի քանիսը հետագայում վերածվեցին մզկիթների: Զարդերից առաջ Ադանայում կար

¹ Տե՛ս Հ. Տէվէճեան, Աշխարհագրութիւն Սուրիոյ եւ Լիբանանի. բնական, քաղաքական եւ տնտեսական, Հալէպ, 1933, էջ 94—95: Ըստ անգլիացի դիվանագետ եւ ճանապարհորդ Ֆերիման Դաքետի՝ կղզի-քաղաք Ադանան ուներ 80 000 բնակիչ, որի զգալի մասը հայեր էին. տե՛ս F. DUCKETT, Turkish Atrocities. The Young Turks and the truth about the Holocaust at Adana in Asia Minor, during April, 1909, Yerevan, 2009, էջ 9:

² Հայերի 40%-ն զբաղվում էր գյուղատնտեսությամբ, իսկ 30%-ն արհեստավորներ եւ խանութպաններ էին. տե՛ս F. DUCKETT, նշվ. աշխ., էջ 8:

18 մզկիթ եւ 8 եկեղեցի, որոնցից 3-ը պատկանում էին Հայ Առաքելական, մեկը՝ Հայ ավետարանական, իսկ մյուսը՝ Հայ կաթոլիկ եկեղեցիներին: Մեկական եկեղեցի ունեին հունական, ասորական ու քաղղեական համայնքները³: Ադանայում էին գտնվում Ս. Մինաս, Ս. Աստվածածին, Ս. Ստեփանոս, Ս. Առաքելոց, Ս. Ղազար, ասորական Ս. Մորոթու (Մորաթու), քաղղեական Ս. Դիլի (Դալիլա) եկեղեցիները եւ բյուզանդական Ս. Հովհաննես Մայր Տաճարը⁴:

1908 թ.՝ երիտթուրքական հեղաշրջումից եւ սահմանադրության հաստատումից մեկ ու կես ամիս անց, ինչպես Օսմանյան կայսրության մյուս շրջաններում, այնպես եւ Ադանայի նահանգում՝ պատմական Կիլիկիայի տարածքում, «սահմանադրասեր» հայերի եւ հակասահմանադրական մահմեդական պահպանողականության միջեւ առկա հակասությունը լուսյայն վերաճում է հայերի ջարդի սպառնալիքի:

1909 թ. կոտորածների նախընթացին Ադանայի նահանգապետ Ջեւադ բեյը եւ նահանգի զորքերի հրամանատար Մուստաֆա Ռեմզին հրահրում են ազգամիջյան ընդհարումներ⁵: Միաժամանակ քուրդ Աբդուլ-Գատերը, Քանիզադե Սայիդը, Քերիմ աղան, Կերկեյլի Ալին, Բայրաքդարզադե Բեքիրը Կիլիկիայի մահմեդական բնակչության շրջանում կեղծ եւ վարկաբեկիչ լուրեր էին տարածում (իբր քաղաքի Ուլու ջամիի (Մեծ մզկիթի) դռանը հայերը կղկղանք էին քսել եւ այն պղծել), որոնք հուզումներ էին առաջացնում մոլեռանդ մահմեդականության շրջանում: Այդ առնչությամբ Մեծի Տանն Կիլիկիո կաթողիկոս Սահակ Բ. Խապայանը (1902—1939 թթ.) Ադանայի հայոց թեմի առաջնորդ Մուշեղ եպս. Սերոբյանին (Սերովբյան) Սսից ուղարկված 1909 թ. փետրվարի 10-ի գրության մեջ ցավով ու տագնապով հայտնում էր. «...այս ճանավար ազգը արիւն խմելու գազանութեան յագուրդ տալու համար իր սրբութիւնները իր ձեռքով կը պղծէ, ըսելու համար, որ «հայը ըրաւ». դարերով այս մէթօտին հետեւած են....»⁶:

Լուրեր էին շրջանառվում նաեւ, թե իբր մի հայ եպիսկոպոս, որը լուսանկարվել էր արքայական թագը գլխին, շրջում էր Կիլիկիայում եւ

³ Տէն Վեր. Հ. ԱՇԱԽԱՆ, Ատանայի եղեռնը եւ Գոնիայէ յուշեր (Պատմութեան համար), Նիւ Եորք, 1950, էջ 15:

⁴ Տէն «Ատանայի հայոց պատմութիւն», Անթիլիաս, 1970, էջ 863—864:

⁵ Տէն Ջ. ԿԻՐԱԿՈՍՅԱՆ, Երիտթուրքերը պատմության դատաստանի առաջ (19-րդ դարի 90-ական թթ. — 1914 թ.), գիրք առաջին, Երեւան, 1982, էջ 269:

⁶ «Կիլիկեան կսկիծներ. Վաւերագրեր Կիլիկիոյ կաթողիկոսական դիւանէն 1903—1915», Պէյրուիթ, 1927, էջ 73—74. նաեւ՝ ՄՈՒՇԵՂ ԵՊՍ. ՍԵՐՈԲԵԱՆ, Ատանայի ջարդը եւ պատասխանատուները, Պոսթոն, 1910, էջ 46:

հայերին կոչ անում քիչ ուտել եւ ծխել, վաճառել ամեն ինչ, նույնիսկ հագուստը եւ այդ գումարով զենք զնել Կիլիկիայի ազատագրության համար⁷։ Կեղծ լուրերից էր նաեւ այն, որ հայ ապստամբները շուտով գրավելու էին Ադանայի զինապահեստը, որին հաջորդելու էր Հաճընի հայերի հարձակումը Ադանայի վրա⁸։

Իրավիճակն Ադանայում թեժանում է հայկական կոտորածների սարսափով։ Մուշեղ եպս. Սերոբյանը նահանգի հայ ազգաբնակչությանը կոչ էր անում լինել խոհեմ եւ հավատարիմ մնալ պետությանն ու սահմանադրության սկզբունքներին։ Բացի այդ՝ նա մի ընդարձակ զեկուցագիր է ուղարկում Զեւադ բեյին՝ ներկայացնելով ղեկավարի իրական պատկերը, սակայն վերջինս հրաժարվում է այն քննարկել։ Այս անգամ Մուշեղ սրբազանը տեղեկագրի պատճենները եւ սաղրիչների անուններն ուղարկում է Կ. Պոլիս՝ Հայոց պատրիարքությանը, կենտրոնական իշխանություններին, հայկական եւ թուրքական թերթերի խմբագրություններին ու պահանջում ստեղծել հատուկ հանձնաժողով՝ փաստերը տեղում ստուգելու եւ հանցավորներին պատասխանատվության ենթարկելու համար։ Սակայն կառավարությունը ոչ միայն անտարբերություն է ցուցաբերում այս հարցում, այլ նաեւ խրախուսում է կազմակերպիչներին⁹։

Կոտորածների նախօրյակին՝ 1909 թ. ապրիլի 1-ին, Զատիկին հաջորդած չորեքշաբթի վաղ առավոտյան Ադանայի առաջնորդարանում գումարվում է քրիստոնյա հոգեւորականների եւ ազգային գործիչների մի ժողով, որը կազմում է պատվիրակություն՝ նահանգապետ Զեւադ բեյի հետ հանդիպելու համար։ Նահանգապետը պատվիրակներին, որոնց թվում էին՝ Պողոս եպս. Թերզյանը, Արսեն քհն. Յեմենիճյանը, հայր Համբարձում Աճյանը, հանրային դատախազ Արթուր Հֆենդին եւ Ադանայի առաջնորդարանի քարտուղարը, հորդորում է՝ «վտանգ բան չկայ...»¹⁰։ Սակայն իշխանությունների անմիջական հրահրմամբ հենց նույն օրն սկսվում են կոտորածները։

Ադանայի ջարդերի առաջին փուլում՝ ապրիլի 1–4-ը¹¹, տարաբախտ հայերի մի մեծ բազմություն ապաստանել էր Հայ Առաքելական՝

⁷ Տէս Հ. ՍԵՐՈՅԱՆ, Հայերի զանգվածային կոտորածները Կիլիկիայում (1909 թ. ապրիլ), Երեւան, 2009, էջ 38–39։

⁸ Տէս Յ. ԹԵՐԶԵԱՆ, Կիլիկիոյ աղէտը (պատկերազարդ). Ականատեսի նկարագրութիւններ, վաւերացումներ, պաշտօնական տեղեկագիրներ եւ թղթակցութիւններ, վիճակագրութիւններ եւ այլն (կարեւոր պատկերներով), հտ. Ա., Կ. Պոլիս, 1912, էջ 44–45։

⁹ Տէս Մ. ԵՊՍ. ՍԵՐՈՒԲԵԱՆ, նշ. աշխ., էջ 33։

¹⁰ ՎԵՐ. Հ. ԱՇՅԵԱՆ, նշ. աշխ., էջ 17։

¹¹ Ադանայի 1909 թ. կոտորածների մասին առավել հանգամանորեն տես Ա. ՀԱՄԲԱՐՅԱՆ, Կիլիկիայի 1909 թ. հայկական կոտորածները, ՊԲՀ, 1988, թ. 4, էջ 13–29. նաեւ Ռ. ԳԱՍՊԱՐՅԱՆ,

Ս. Աստվածածին եւ Ս. Ստեփանոս, Հայ կաթողիկ, Հայ ավետարանական ու ասորական եկեղեցիներում, Քրանսիացի եզուիթների եւ մայրապետների դպրոցում, ամերիկյան «Աղջկանց գոլէճ»-ում եւ միսիոներ Ուիլյամ Չեմբրսի բնակարանում, իսկ Ս. Ստեփանոս եկեղեցու բակում գտնվող Աշխենյան իգական վարժարանը վեր էր ածվել հիվանդանոցի¹²: Ահա այսպես է նկարագրում ստեղծված իրավիճակը Ս. Ստեփանոս եկեղեցում պատսպարվածներից մեկը. 1909 թ. ապրիլի լույս 1-ի գիշերը. «Երկսեռ ժողովուրդն ամբողջապէս ծոնկի եկած աղեկտուր եւ լաց ու կոծերով «Տէր, ողորմեա՛» կը կանչէր, եւ դուրսը խուժանը եկեղեցւոյ վրայ... քարիւղ կը սրսկէր ջրահաններով... եկեղեցւոյ առաջնորդարանը կրակ առած էր: Եկեղեցւոյ բակն ալ ելլել անկարելի դարձաւ, որովհետեւ կարգը եկեղեցիին եկած էր: Տաճարին ներսը սոսկալի տաքով՝ խեղդող մոխրմը սկսաւ լեցուիլ: Հակառակ ամբողջապէս քարաշէն ըլլալուն՝ ջերմութեան սաստկութենէն գմբէթը, պատերն ու մարմարեայ սիւներն ճաթեցան... ճշմարիտ դժոխքի մը վերածուած էր Ս. Ստեփանոս եկեղեցին»¹³:

Խելակորույս տղամարդիկ ու կանայք, երեխաներն ու ծերերը, ողջերն ու վիրավորները, բոլորը հրո ճարակ դարձան: Բացառութեամբ Մայր եկեղեցու՝ պղծվեցին եւ հրկիզվեցին բոլոր եկեղեցիները, խորտակվեցին սեղաններն ու խաչերը, թալանվեցին եւ ոտնատակ արվեցին սրբությունները:

Կոտորածներն իրագործվում էին այնպիսի դաժանութեամբ, որ Ադանայի հոգեւորականությունն ապրիլի 6-ին օսմանյան խորհրդարանին ուղղված հեռագրում նշում էր, որ այդպիսի հալածանքներ տեղի չէին ունեցել անգամ Չինգիզ խանի եւ Լենկ Թեմուրի ժամանակներում¹⁴: Հայ հոգեւորականի նկատմամբ իրականացված դաժանութեան մասին է վկայում կաթողիկ առաքելության ներկայացուցիչ հայր Ռիգալը. «Մի հոգեւորականի հավատուրաց դարձնելու նպատակով աչքերը հանեցին շերքեզական երկսայրի սրով, որը պատեցնում էին աչքերի արնաշաղախ բներում այնպես, ինչպես փայտի կտորն են շաղափում: Այդ նույն սրով կտրեցին նրա լեզուն եւ ջարդեցին ատամները»¹⁵:

Ադանայի 1909 թ. Կոտորածները. Հողվածների եւ հրապարակումների ժողովածու, Երեւան, 2013, էջ 33–51:

¹² Տէն «Ատանայի հայոց պատմութիւն», էջ 235 եւ 238:

¹³ Յ. Թէրզեան, նշ. աշխ., էջ 103:

¹⁴ Տէն Վեր. Հ. ԱՇՃԵԱՆ, նշ. աշխ., էջ 21:

¹⁵ «Հայերի ցեղասպանությունը Օսմանյան կայսրությունում. փաստաթղթերի եւ նյութերի ժողովածու», խմբ.՝ Մ. Ներսիսյան, Երեւան, 1991, էջ 258:

Ջարդերից զերծ չմնացին նաեւ հարանվանությունները՝ Հայ ավետարանական, Հայ կաթողիկե Եկեղեցիների ներկայացուցիչները: Մարտի 31-ին, երբ կենտրոնական իշխանությունն զբաղված էր Կ. Պոլսում հակասահմանադրական ցույցերը ճնշելով, Օսմանիեի մոտակայքում քաղաքի փոխկառավարչի թողտվությամբ դաժանաբար ողջակիզվեց Հայ ավետարանական Եկեղեցու Հասան Բեյլիի 23 (ըստ որոշ տեղեկությունների՝ 11)¹⁶ հոգանոց պատվիրակությունը, որը մեկնում էր Ադանա՝ Հայ ավետարանական Եկեղեցիների ապրիլի 4-ին նախատեսվող տարեկան համագումարին՝ «Հոգեւոր պետերու Կիլիկեան միութեան ժողով»-ին մասնակցելու համար¹⁷: Նույն ճակատագրին արժանացան նաեւ Մարաշից, Այնթապից եւ Ուրֆայից եկած ու Սայ-Կեչիտում հավաքված 9, Չայրը-Աղշը եւ Համիդիե հասած ավետարանական 7 հոգեւոր առաջնորդները: Նրանց նկատմամբ իրականացված վայրագությունները չէին զիջում Հայ Առաքելական Սուրբ Եկեղեցու հետեւորդներին բաժին հասած տառապանքներին: Անաստաս Ասոսիտիսը, մեջբերելով բողոքական հոգեւորականի վկայությունը, մատնանշում է, որ Հասան Բեյլիի հայ բողոքական պատվելի կինն ապրիլյան կոտորածների ժամանակ կորցրել էր ամուսնուն, երկու որդուն, չորս եղբորը եւ բազմաթիվ ազգականներին¹⁸:

Այրվում ու կործանվում են նաեւ ճիզվիտական, ասորական, քաղդեական, լատին բողոք եկեղեցիները՝ բացի հունաց եկեղեցուց, որը գտնվում էր քրիստոնեական թաղի ծայրամասում: Ամերիկացի պատմաբան Ջոզեֆ Գրինը նշում է. «...Կոստանդնուպոլսի խռովության իսկ օրը Ադանա քաղաքի ու նահանգի մահմեդական բնակչությունը, որին հրահրում էին Կոստանդնուպոլսից, հարձակվեց քրիստոնյա հպատակների վրա եւ մի քանի օրվա ընթացքում կողոպտեց ու սպանեց 20 000 հայի, ավերեց քրիստոնեական բազմաթիվ գյուղեր, եկեղեցիներ, դպրոցներ, սպանեց մեծ թվով վարդապետների, այդ թվում՝ ամերիկացի երկու միսիոներների եւ 20 բողոքական քահանայի, ինչպես նաեւ՝ վարժարանի մի պրոֆեսորի... Խռովությունն ու կոտորածը... հրեշավոր սուլթան Աբդուլ Համիդի վերջին ճիգերն էին»¹⁹:

¹⁶ Տե՛ս «Ատանայի հայոց պատմություն», էջ 227:

¹⁷ Տե՛ս Ռ. ձեղեխյան, Ինքնակենսագրություն, յուշեր եւ գործունեություններ, Հալէպ, 1999, էջ 18–19:

¹⁸ Տե՛ս Ա. ԱՏՈՍԻՏԻՍ, Հայերը եւ երիտասարդ թուրքերը. Կիլիկիոյ կոտորածները, հտ. Ա., Հալէպ, 2009, էջ 89–90:

¹⁹ REV. J. K. GREENE, Leavening the Levant, Boston-New-York-Chicago, 1916, p. 42.

Առաջին ջարդից հետո՝ ապրիլի 5–11-ը, իշխանությունները հայերին խաղաղության կոչ են անում: Զինվորական ատյանը հայ հոգեւորականներից պահանջում է հավաքել եւ կառավարությանը հանձնել ինքնապաշտպանության դիմած հայերի զենքերը, «եթէ ոչ ուրիշ ջարդ մըն ալ կրնայ պատահիլ»²⁰: Արդյունքում՝ իշխանությունները խաբեությամբ հավաքում են հայերին պատկանող զինամթերքը: Իրենց ապահովագրելով հայերի հնարավոր նոր դիմակայությունից՝ թուրքերը Ռումելիից՝ եւրոպական Թուրքիայից բերված 3 գունդ զինվորների մասնակցությամբ, նախապես կազմակերպված սադրանքի միջոցով (իբրեւ հայերն իրենց եկեղեցու զանգակատնից կրակել են թուրքական բանակի վրա) երկրորդ անգամ՝ ապրիլի 12–13-ին Ադանայում կազմակերպեցին նոր կոտորած²¹:

Ապրիլի 13-ին ճիզվիտ հայերը, հայտնվելով անելանելի իրավիճակում, որոշում են ժողովրդին մատնել բախտի քմահաճույքին եւ «...իրենց խաչին ներքեւ ապաստանած ժողովուրդը տանիլ ոչխարներու հօտերու պէս յանձնել կառավարութեան գուծին... Ինչ կ'ուզեն, թող ան ընեն...»²²: Նրանց կոչով հայության խլյակները «...բոկոտն, գլխաբաց, անսուաղ, յուսահատ...»²³ թափոր-թափոր հասնում են կուսակալանիստ Սերայի եւ Սիհուն գետի միջեւ ընկած պարտեզներն ու սպասում իրենց ճակատագրին:

Ապրիլի 13-ին երկրորդ անգամ իշխանության եկած Աբդուլ Համիդ Բ.-ն, որը վայելում էր իր 33-ամյա գահակալության վերջին օրը եւ Կ. Պոլսում վերջին կռիվն էր մղում երիտթուրքական «Ազատության բանակի» դեմ, «ներում» է շնորհում հայերին՝ պահանջելով, որ նրանք քանդեն սահմանադրության պատվին Ադանայի քաղաքապետարանի շենքի առջեւ կանգնեցված «Ազատության կամարը» եւ բացականչեն «**Վաթիշա-Լըմ չօփ Էաշա**» («մեր սուլթանը շատ ապրի» — Վ. Հ.)²⁴:

1909 թ. ապրիլի 1–4-ը եւ 12–13-ը կենտրոնական ու տեղական իշխանությունների փոխհամաձայնությամբ Ադանայում տեղի ունեցած խաղաղ բնակչության կոտորածի արդյունքում զոհվեց մոտ 18 627 հայ²⁵, հրո ճարակ

²⁰ «Ատանայի հայոց պատմություն», էջ 243:

²¹ Տէս Հ. ՂԱԶԱՐԵԱՆ, Ցեղասպան թուրքը, Պէյրուի, 1968, էջ 15:

²² «Ատանայի հայոց պատմություն», էջ 250:

²³ Տէս անդ:

²⁴ Տէս անդ, էջ 251–252:

²⁵ Տէս Հ. ՊՈՂՈՍՅԱՆ, Զելթունի պատմությունը 1409–1921 թթ., Երեւան, 1969, էջ 367: Ըստ մեկ այլ վկայության՝ Ադանայի հայ ազգաբնակչության զոհերի թիվը կազմում էր 23 500. տէս «Հորիզոն», Թիֆլիս, 1910 թ. ապրիլի 2, թիւ 73: Աշխարհում առաջին հայ կին դիվանագետ,

դարձավ 5189 տուն²⁶, երեք հարյուր կալվածք, հափշտակվեց ավելի քան տասը հազար գլուխ անասուն, իսկ նյութական վնասը կազմեց 20 մլն թուրքական լիրա (ժամանակի փոխարժեքով՝ մոտավորապես 500 մլն ֆրանկ)²⁷: Պատահական չէ, որ երիտթուրքերի պարագլուխներից Ջեմալ փաշան, որն Ադանայի արյունալի դեպքերից չորս ամիս անց՝ օգոստոսի կեսերին նշանակվել էր Ադանայի վիլայեթի նահանգապետ, հաշտեցման նպատակով 1910 թ. հունվարի 23-ին Ադանայի հայ եւ թուրք պետական, ռազմական ու հոգեւոր երեւելիների պատվին կազմակերպած խնջույքում արտասանած իր ճառում այդ կոտորածները գնահատում էր քրիստոնյաների համար որպես նյութական, իսկ մահմեդականների համար՝ բարոյական վնաս²⁸: Կոտորածների հետեւանքով կործանվեց 32 եկեղեցի եւ զոհվեց 42 հոգեւորական²⁹: Հաշվի առնելով այդ ամենը՝ Նյու Յորքում տպագրվող «World Almanax» պարբերականն Ադանայի 1909 թ. դեպքերը բնութագրել է որպես «հակաքրիստոնէական ապստամբութիւն Ադանայում»³⁰: Կոտորածներից հետո «շքեղ Ադանան» դարձավ «դրմա Ադանա» («մսաղաց Ադանա»), իսկ կոտորածի գիշերը կոչվեց «Ջամա-լ Դէլլէն-Դէ» («գոմեշը գժվեց»)³¹:

Երիտթուրքական կառավարող շրջանները, խեղաթյուրելով պատմական իրական փաստերը եւ խուսափելով մեղսակցությունից, ջանում էին որպես Ադանայի ջարդերի պատասխանատու ներկայացնել քաղաքի

Ճապոնիայում Հայաստանի Առաջին Հանրապետության դեսպան Դիանա Աբգարը, հիմք ընդունելով ամերիկացի ակնաստես Ի. Գ. Ֆրայերի վկայությունները, զոհերի թիվը ներկայացնում է 63 հազար. տե՛ս «Դիանա Աղաբեկ Աբգար. կեանքը եւ գործունէութիւնը», Նոր Զուղա, 2011, էջ 77:

²⁶ Օսմանյան խորհրդարանի պատգամավոր Յուսուֆ Քեմալի հիշատակած թիվը վերաբերում է միայն այն շինություններին, որոնք ենթակա էին վերականգնման. տե՛ս «Հայերի ցեղասպանությունը Օսմանյան կայսրությունում...», էջ 265:

²⁷ Հմմտ. Հ. ՄԱՐՏԻՐՈՍՅԱՆ, Կիլիկիայի 1909 թվականի ապրիլի հայկական կոտորածը եւ երիտասարդ թուրքերի պատասխանատվության հարցը. տե՛ս «Մերձավոր եւ Միջին Արեւելքի երկրներ եւ ժողովուրդներ», V, Թուրքիա, էջ 301:

²⁸ Տե՛ս Յ. ԹԵՐԶԵԱՆ, նշ. աշխ., էջ 254. նաեւ՝ Հ. ՊՈՂՈՍՅԱՆ, նշվ. աշխ., էջ 369 :

²⁹ Հայ Առաքելական Սուրբ Եկեղեցու սպասավորներն էին Միքայել վրդ. Աջապահյանը (Միսիս), Մկրտիչ վրդ. Թապաղյանը (Համիդիե), Կարապետ քհն. Թելլալյանը (Համիդիե), Արսեն վրդ. Հարությունյանը (Անտիոք), Դանիել վրդ. Հակոբյանը (Անտիոք), Ստեփան/Արսեն քհն. Գոփուշյանը (Ադանա), Պետրոս քհն. Քեշիշյանը (Հասան-Բեյլի), Հովհաննես քհն. Քեշիշյանը (Հասան-Բեյլի), Ներսես քհն. Պողոսյանը (Հասան-Բեյլի), Վահան քհն. Տեր-Ստեփանյանը (Պահլե), Հովհաննես քհն. Քեշիշյանը (Լափուճը), Դեոնդ քհն. Քեշիշյանը (Լափուճը), Մկրտիչ քհն. Զափարճյանը (Խարնը), Պողոս քհն. Տեր-Պողոսյանը (Օճագլը), Հակոբ քհն. Նալբանդյանը (Գրըզլիան), Արմենակ քհն. Դոնադոսյանը (Անտիոք). այս կապակցությամբ տե՛ս «Ատանայի հայոց պատմություն», էջ 267—268:

³⁰ Տե՛ս «Դիանա Աղաբեկ Աբգար...», էջ 77:

³¹ Վ. ՍԱԶԼԵԱՆ, Հայոց ցեղասպանություն. Ակնաստես վերապրողների վկայություններ, Երեւան, 2011, էջ 433:

հայոց հոգեւոր առաջնորդ Մուշեղ եպս. Սերոբյանին³², որն իբր կոտորածի օրերին զոհվել էր իր կացարանում՝ ռումբի պայթյունի հետեւանքով³³: Սակայն իրականում Մուշեղ սրբազանը Ադանայի դեպքերից մոտ մեկ ամիս առաջ՝ մարտի 4-ին, մեկնել էր Եգիպտոս՝ Ադանայում կառուցվող երկրագործական վարժարանի համար գումար հանգանակելու նպատակով: Ավելին, երբ նա լսում է աղետի լուրը, անգլիական նավով շտապում է վերադառնալ Ադանա: Թուրքական իշխանություններն արգելում են նրա մուտքը Մերսին՝ որպես անցանկալի անձ: Օսմանյան իշխանությունները տեղեկացնում են Մերսինի անգլիական հյուպատոսին եւ սպառնում՝ «...եթէ Մուշեղ ցամաք ելլէ՝ թէ՛ Մերսինի մէջ դէպքեր կը պատահին եւ թէ՛ Ատանայի եւ շրջակայից մէջ նոր խռովութիւններ կը ծագին. ուստի խտրական նաւապետին հրաման ըրէք, որ Մուշեղը արգիլէ նաւէն դուրս ելլելու»³⁴: Անգլիական հյուպատոսի հրահանգով Մուշեղ եպիսկոպոսը արգելափակվում է նավում եւ հետ է վերադառնում Ալեքսանդրիա: Եթե նա իսկապես մեղավոր էր, ապա ամենահարմար տարբերակը նրան ձերբակալելն ու պատասխանատվության ենթարկելն էր եւ ոչ թե հետ ուղարկելը:

Զեմալ փաշան նշում է, որ «իրենից ավելի լավ որեւէ մեկը չէր կարող ծանոթանալ հոգեբանական այն նախադրյալներին, որոնք առաջ բերեցին այդ կոտորածը»³⁵: Անտեսելով իրականությունը Ադանայի ջարդերի կազմակերպման գործում՝ նա մեղավոր է համարում միայն հայերին, հատկապես՝ վերակազմյալ հնչակյան կուսակցության անդամ Մուշեղ եպիսկոպոսին³⁶:

³² Տէս ESAT URAS, Tarihte Ermeniler ve Ermeni meselesi, Ankara, 1950, էջ 456: Մուշեղ եպս. Սերոբյանը Մեծի Տանն Կիլիկիո կաթողիկոսության ազատախոհ ու խիզախ հոգեւորականներից էր: Նա ծնվել է 1869 թ. Իզմիթ (Արսլան բեկ) քաղաքում, սովորել Արմաշի դպրոցում, իսկ 1895 թ. ձեռնադրվել վարդապետ: 1905 թ. Մուշեղ եպս. Սերոբյանը դառնում է Ադանայի հոգեւոր առաջնորդ եւ իր նրբամիտ քաղաքականությամբ ձեռք է բերում Ադանայի նախկին կուսակալ Պահրի փաշայի համակրանքը: Սահակ Բ. Խապայան կաթողիկոսը, գնահատելով նրա մարդկային ու հոգեւոր արժանիքները, 1906 թ. հոկտեմբերի 28-ին (առանց Կ. Պոլսի Հայոց պատրիարքարանի համաձայնության) նրան ձեռնադրեց եպիսկոպոս: Այս քայլն առաջ բերեց Արեւմտյան Հայաստանի կրոնական բարձրագույն երկու իշխանության վիճաբանություն, որի հետեւանքով Կ. Պոլսի պատրիարքությունը Մուշեղ եպս. Սերոբյանի հոգեւոր պաշտոնավարումը ճանաչեց միայն կաթողիկոսության կիրիկյան թեմերի շրջանում. տես Մ. Քէլէճեան, Սիւ-Մատեան. Պատմական, բանասիրական, տեղագրական, ազգագրական եւ յարակից պարագաներ, Պէյրուս, 1949, էջ 234:

³³ Տէս D. ARIKOĞLU, Hatıralarım: Milli Mücadele: Çukurova'da Fransız işgali ve kanlı savaşlar, Birinci Büyük Millet Meclisi, yurttan çeşitli isyanlar, yunanlıların denize dökülmesi, Atatürkten hatıralar, resimler vesikalar. İstanbul, 1961, էջ 54:

³⁴ «Ատանայի հայոց պատմություն», էջ 225, 304:

³⁵ Տէս «Записки Джемаль Паши 1913—1919 гг.», Тифлис, 1923, էջ 210:

³⁶ Տէս անդ:

Զեմալ փաշայի այս կեղծ տեսակետն է պաշտպանում նաեւ Ի. դարի թուրք պատմաբաններից Իսմայիլ Համի Դանիշմենդը, որն իր «Օսմանյան պատմության համառոտ ժամանակագրություն» քառահատոր աշխատության վերջին գրքում պնդում է, թե՝ «Ադանայի դեպքը» կազմակերպել էր այնտեղի հայ հեղափոխական եպիսկոպոս, Մուշեղ անունով արյունարբու հոգեւորականը³⁷:

Սակայն քրդական ծագմամբ թուրք լրագրող Մելան Զադե Րիֆաթը, որ Միություն եւ առաջադիմություն կուսակցության գաղտնի ժողովների անմիջական մասնակիցն է եղել ու քաջատեղյակ է դրա ողջ գործունեությանը, անձնական հուշերի եւ փաստական հարուստ նյութերի հիման վրա նկարագրելով Կիլիկիայի 1909 թ. դեպքերը՝ հավաստում է, որ կոտորածների իրական կազմակերպիչը ոչ թե Մուշեղ եպս. Սերոբյանն էր, այլ երիտթուրքական կուսակցությունը՝ նախապես որոշած ու գործադրած իր քաղաքականությունը³⁸:

Ի դեպ, Կիլիկիո հայերի 1909 թ. կոտորածներից հետո միջազգային մամուլի էջերում շրջանառվում էր այն մտայնությունը, որ այդ նախճիրը համիդյան կոտորածների քաղաքականության վերջաբանն էր³⁹: Մուշեղ եպս. Սերոբյանը, ապա նաեւ Հակոբ Թերզյանը առաջին հայ հեղինակներն էին, որոնք բացահայտեցին Ադանայի 1909 թ. կոտորածների ժամանակ երիտթուրքերի հանցապարտ քաղաքականության խորամանկ էությունը: Մուշեղ եպիսկոպոսը 1909 թ. Ֆրանսերենով հրատարակած իր արժեքավոր աշխատության մեջ⁴⁰ եւ «Հայկական նոր ջարդերի նախօրյակին» հոդվածում⁴¹ վեր հանեց եւ մերկացրեց երիտթուրքերի անմիջական մասնակցությունը 1909 թ. կոտորածների կազմակերպման գործում՝ շեշտելով, որ Կիլիկիայի ջարդերն ամենեւին էլ վերջինը չէին, այլ իթթիհատի կառավարության ջարդարարական քաղաքականության սկիզբն էին:

³⁷ Sêu I. DANIŞMEND, İzahlı Osmanlı Tarihi Kronolojisi 4 Cilt Takim, Cilt 4, İstanbul, 1947, էջ 374:

³⁸ Sêu Մ. ՐԻՖԱԹ, Օսմանեան յեղափոխութեան մութ ծալքերը եւ իթթիհատի հայաջինջ ծրագիրները, Երեւան, 1990, էջ 104—111:

³⁹ Այդ մասին առավել հանգամանորեն տե՛ս Ա. ԽԱՌԱՅՅԱՆ, Ադանայի 1909 թ. կոտորածի լուսաբանումը արեւմտահայ մամուլում, ՊՐՀ, 2009, թ. 1, էջ 3—14. Տ. ՂԱԼԹԱՆՉՅԱՆ, Ադանայի 1909 թ. կոտորածների առաջին արձագանքները արեւմտահայ մամուլում, ԼՀԳ, 2015, թ. 1, էջ 3—13:

⁴⁰ Sêu MGR MOUCHEGH [SEROBIAN], Les Vêpres ciliciennes. Les responsabilités. Faits et documents (Histoire), Alexandrie, 1909: Մեկ տարի անց աշխատությունը համառոտ տարբերակով թարգմանվել ու հրատարակվել է հայերեն. տե՛ս վերելում մեր նշած աշխատությունը:

⁴¹ Sêu MGR MOUCHEGH, À la veille des nouveaux massacres arméniens, La Revue, Paris, 15 août 1910:

Ադանայի հայ բնակչության կոտորածների առնչությամբ Սահակ Բ. Խապայանն ու հայ բարձրաստիճան հոգեւորականները բողոք-խնդրագրերով եւ խստաոճ հեռագրերով դիմեցին Գոզանի (Սսի) մյուլթեսարիֆին, ներքին գործերի նախարարությանը, արդարադատության նախարարին, կայսերական պալատին, Օսմանյան խորհրդարանին, Կ. Պոլսի պատրիարքարանին՝ պահանջելով պատժել թուրք ոճրագործներին, վերականգնել արդարությունը եւ նյութական օժանդակություն ցուցաբերել անապահով հայերին⁴²։ Այսպես՝ Օսմանյան խորհրդարանին ուղղված 1909 թ. հունիսի 11-ի տեղեկագրի վերջում կաթողիկոսը մտահոգություն էր հայտնում, որ եթե Օսմանյան պետությունը եւ քաղաքակիրթ թուրքերը անհոգ գտնվեն ջարդերի հանդեպ ու չցանկանան «օսմանեան ազգին ճակատէն սրբելու ջարդի, հրկիզումի, կողոպուտի, առեւանգութեանց եւ հարստահարութեանց ամօթի արատը... պիտի դիմեմ յոտս աստուածային գահոյից»⁴³։

Նախատեսվում էր, որ այդ խնդրով պետք է զբաղվեր հայոց պատրիարքարանը⁴⁴։ Ի վերջո, բողոքների հիման վրա կոտորածների կազմակերպիչներին պատասխանատվության ենթարկելու եւ Օսմանյան խորհրդարանին «Տեղեկագիր» ներկայացնելու համար իր թուրք գործընկեր Յուսուֆ Քեմալի հետ մայիսի 29-ին Ադանա է ժամանում օսմանյան խորհրդարանի էդիրների հայազգի պատգամավոր եւ երիտթուրքական կուսակցության անդամ Հակոբ Պապիկյանը. վերջինս եզրակացնում է, որ Միություն եւ առաջադիմություն կուսակցության անդամները մասնակցել էին Ադանայի եղեռնագործության կազմակերպմանն ու իրագործմանը⁴⁵։ Սակայն իր անաչառության եւ արդարամտության համար Հակոբ Պապիկյանը օգոստոսի 1-ին թունավորվում է։

1909 թ. ապրիլի 1-ին սկսած Ադանայի ջարդը տարածվեց ողջ Կիլիկիայով, եւ «նույն բաժինը հասավ նաեւ Սիսին, Այասին ու Պայասին»⁴⁶։ Փորձություններից անմասն չմնաց հատկապես Սիսը (Գոզանը), որը կիլիկյան ամենահայտնի մայրաքաղաքն էր։ Այն կառուցվել էր Հայկական Տավրոսի լանջերին՝ ընդարձակ դաշտում։ Առաջին աշխարհամարտի

⁴² Տէս Մ. ՔէլէՇեւս, նշ. աշխ., էջ 277։

⁴³ «Կիլիկեան կսկիծներ...», էջ 88։

⁴⁴ Տէս «Հորիզոն», Թիֆլիս, 1910, փետրուարի 19, թիւ 39։

⁴⁵ Այդ մասին առավել մանրամասն տե՛ս «Ատանայի եղեռնը. Տեղեկագիր Յակոբ Պապիկեանի, օսմանեան երեսփոխան էտիրնէի», Կ. Պոլիս, 1919, էջ 42։

⁴⁶ Տէս «Геноцид армян в Османской империи». «Сборник документов и материалов», под редакцией М. Г. Нерсисяна, Ереван, 1982, էջ 193։

նախօրյակին քաղաքն ուներ 3500 բնակիչ, որոնցից 2500-ը հայադավան էին, 300-ը՝ հայ կաթոլիկ եւ բողոքական, իսկ 700-ը՝ մահմեդական⁴⁷։ Քաղաքում էր գտնվում Կիլիկիո կաթողիկոսարանը, իսկ Սսի մոտակայքում՝ Անարզաբայի (Անավարզայի) բերդը⁴⁸։

1908 թ. սահմանադրութեան ընդունումը ոգեւորութիւն առաջացրեց բնակչութեան շրջանում։ Գավառապետ Մուսա Քյազիմ բեկը, ելույթ ունենալով քաղաքի վանքերից մեկում, հայ եւ թուրք ժողովուրդների բարեկամութիւն ու հավասարութիւն հռչակեց⁴⁹։ Բացվեցին վարժարաններ՝ ազատ ուսուցման ծրագրերով եւ կուսակցական ակումբներ⁵⁰։ Սակայն այդ ամենից հետո էլ շարունակվեցին ձերբակալութիւնները, սպանութիւններն ու բռնութիւնները։ 1908 թ. հուլիսի 10-ին Սսի մոտակայքում գազանաբար հոշոտվեց երեք հաճնցի։ Ձերբակալված ոճրագործները հայտարարեցին, որ «քրիստոնեաները ջարդելու գաղտնի կազմակերպութիւն մը կայ, եւ թէ իրենք ալ անոր հրամանը գործադրած են»⁵¹։ Նրանք թեւեւ մահվան դատապարտվեցին, սակայն բանտից փախան եւ միայն 1910 թ. կախաղան բարձրացվեցին Սսի Բաշար Երի կոչվող հրապարակում⁵²։

Ռամազանի (Ramazan կամ Ramadan Bayram) ընթացքում Սսի թուրք հոգեւորականն իր քարոզում չվարանեց նշելու, որ «մենք գեաւուրներու հետ եղբայր չենք կըրնար ըլլալ, անոնց հետ միութիւնը անկարելի է։ Շեքիաթը բացարձակօրէն կարգիլէ այդ բանը, չենք կըրնար մեր ծոցը պահել օձերը, որոնց խայթող ըլլալուն կասկած չունինք»⁵³։

Քաղաքի կաթոլիկ վարդապետի (անունը մնում է անհայտ) սաղրանքով ձերբակալվեցին Եզնիկ քահանան, Գրիգոր Էֆ. Գյոքչյանը եւ Հարութիւն աղա Գասպյանը, սակայն հարցաքննութիւնից հետո ազատ արձակվեցին⁵⁴։

Ապրիլի 1-ին՝ Զատիկին հաջորդող երկուշաբթի օրը, երբ Աղանայում արդեն արցան գետեր էին հոսում, դեպքերից անտեղյակ սսեցիները, ավանդույթի համաձայն, հավաքվեցին մոտակա դաշտում՝ դիտելու հայ

⁴⁷ Տէս «Մատենադարան «Արաքս»-ի. «Կիլիկիա. փորձ աշխարհագրութեան արդի Կիլիկիոյ», Սանկտ Պետերբուրգ, 1894, էջ 151: Հստ մեկ այլ վկայութեան՝ Սիսն ուներ 3.700 բնակիչ, որոնցից 3000-ը հայեր էին. տէս «Հորիզոն», Թիֆլիս, 1910, ապրիլի 1, թ. 72:

⁴⁸ Տէս Հ. Տէվէճեան, նշ. աշխ., էջ 96:

⁴⁹ Տէս անդ, էջ 111:

⁵⁰ Տէս անդ, էջ 542:

⁵¹ Յ. Թէրջեան, նշ. աշխ., էջ 13:

⁵² Տէս Մ. Քէլեճեան, նշ. աշխ., էջ 544:

⁵³ Անդ:

⁵⁴ Տէս անդ, էջ 541:

եւ թուրք ըմբիշների մենամարտերը: Թուրքերը՝ բոլոր անցուղարձներից տեղյակ եւ մինչեւ ատամները զինված, պատրաստվել էին թուրք ըմբիշի պարտության դեպքում, առանց հապաղման, սկսելու կոտորածը: Բարեբախտաբար, սսեցի մարդասեր մի թուրք հայերին զգուշացնում է հնարավոր վտանգի մասին եւ կեղծ պարտության միջոցով հայերը կարողանում են առժամանակ խուսափել ջարդից, որից հետո թուրքերը հայտարարում են. «Թող գեաւուրները օր մ'ալ ապրին»⁵⁵:

Ապրիլի 2-ին Սիս հասավ Սայ-Կեչիտի ողբերգության լուրը, որտեղ սպանվել էր 30 բողոքական քարոզիչ, ի թիվս այլոց նաեւ Սսի 38-ամյա հովիվը՝ Մելիտոն Մալյանը⁵⁶:

Շատ ծանր տպավորություն թողեց նաեւ 28-ամյա Միքայել Ժ. վրդ. Աջապահյանի նահատակության լուրը, որն իբրեւ կաթողիկոսական փոխանորդ զատկական արարողություններին մասնակցելու համար ուղարկվել էր Միսիս⁵⁷: Նա խուժանի կողմից վայրագորեն խոշտանգվում եւ անդամահատվում է:

Սահակ Բ. Խապայան կաթողիկոսը, որը մի քանի օր պաշարված էր մնացել վանքում⁵⁸, տեսնելով դրուժյան լրջությունը, Հաճընից զինված օգնություն խնդրեց Սսի հայերի ջարդը կանխելու համար⁵⁹:

Իր պատասխան հեռագրում Հաճընի առաջնորդ Ներսես եպս. Դանիելյանը հայտնում էր, որ մինչեւ «Զէյթունի ոյժերն ալ հասնին մենք արդէն 500 հաճնցիներ ճամփայ հանեցինք»⁶⁰: Երբ նրա հեռագիրը հասավ Սսի մյուսթեսարիֆին, վերջինս սարսափած վազեց կաթողիկոսի մոտ եւ խոստացավ քաղաքը պաշտպանել բաշիբոզուկներից, միայն թե հաճնցիները չգան Սիս: Երկար տատամսումներից հետո տեղական իշխանությունը որոշեց զենք բաժանել հայերին: Դեռնդ Ժ. վրդ. Թուրսարգիսյանի եւ Գյուլտ Ժ. վրդ. Մխիթարյանի գլխավորությամբ կազմվեցին կամավորական խմբեր: Քաղաքի շուրջը կառուցվեցին պատնեշներ, իսկ կանայք ու երեխաները պատսպարվեցին վերին թաղում եւ Մայրավանքի պարիսպների հետեւում: Ինչպես Մ. Քելեշյանն է նշում, ճակատագրական այդ պահին

⁵⁵ Տէս անդ, էջ 545:

⁵⁶ Տէս Յ. ԹԷՐԶԵԱՆ, նշ. աշխ., էջ 159:

⁵⁷ Տէս Գ. ՉԱԳՄԱԳՃԵԱՆ, Տէր, զի բացցին աչք մեր, Կիպրոս, 1957, էջ 7–9:

⁵⁸ Տէս Ե. Հ. ՔԱՍՈՒՆԻ, Հանդիպումներ ճանապարհին. դէմքեր, դէպքեր, վայրեր (Ժանօթագրութիւններ), Պէյրուիթ, 2010, էջ 252:

⁵⁹ Տէս «Հասկ», Անթիլիաս-Բէյրութ, 1939, նոյեմբեր-դեկտեմբեր, թ. 11–12, էջ 146:

⁶⁰ Մ. ՔԷԼԵՇԵԱՆ, նշ. աշխ., էջ 545:

«սիսեցի թուրքերն ալ հայերու հետ էին»⁶¹։ Թուրքերից ու հայերից կազմվեց 50 հոգանոց մի հեծելազոր, որի հրամանատարներն էին ալբանացի Գոլ Աղասին եւ թուրք Դելի Մեթոն (Մահմեդ)⁶²։ Այս հեծելակը դիրքավորվեց ռազմավարական առումով ամենավտանգավոր բարձունքին։

Սահակ Բ. կաթողիկոսի հրամանով բացվեցին վանքի ամբարները եւ այնտեղ եղած ամբողջ հացահատիկն ու մյուս մթերքները բաժանվեցին կարիքավորներին եւ քաղաքի պաշտպաններին։ Կաթողիկոսը հաճախ էր լինում կովի առաջնագծում եւ իր հորդորներով ու խրատներով ոգեշնչում կովողներին, որոնք երգվում էին մինչեւ վերջին հնարավորությունը դիմադրել թշնամուն⁶³։

Ելնելով ստեղծված իրավիճակից՝ Սսի մյուլթեսարիֆը ապրիլի 3-ին հեռագրում է Ադանայի կուսակալին եւ խնդրում. «Սիսի, Ղարսպազարի շրջակայից մէջ հայոց կեանքը վտանգի մէջ ըլլալով զինուորական ոյժ ղրկեցէք»։ «Օգնությունը» չհապաղեց. ուղարկվեց Ռումելիից բերված զինվորական ուժը, որը պատրաստվում էր Սիսում իրականացնել այն, ինչ արդեն կատարել էր Ադանայում, այն է՝ կոտորել հայ բնակչությանը։ Մինչ այդ, Սահակ Բ. կաթողիկոսը ապրիլի 4-ին եւ 7-ին հեռագրեր ուղարկեց Կ. Պոլիս հետեւյալ բովանդակությամբ. «Ամէն կողմ ջարդերն ու հրդեհները կը շարունակուին. խնդրեցէք կառավարութենէն շուտափոյթ տնօրինութիւն»։ Ապրիլի 9-ին եկավ հուսագրիչ պատասխան. «Դիմումներ կը կատարուին, ուր որ անկ է»։

Ապրիլի 14-ին 5000 թուրք գյուղացի շրջապատեց Սիսը եւ պատգամավորություն ուղարկեց Գոլ Աղասու մոտ, որ քաղաքը հանձնվի։ Մերժողական պատասխան ստանալով՝ նրանք անցան հարձակման, սակայն պարտություն կրեցին ու նահանջեցին՝ թողնելով տասնյակ դիակներ։ Արտակարգ խիզախություն դրսեւորեց Կիլիկիո աթոռի միաբան Ղեւոնդ ծ. վրդ. Թուրսարգիսյանը, որն ստացած վերքերից մահացավ 1910 թ. Կ. Պոլսի Ս. Փրկչի ազգային հիվանդանոցում⁶⁴։

Նույն օրը Ռումելիից բերված բանակի զինվորական կենտրոնը, որը խուժանի հետ միացած սաստիկ կոտորած էր իրականացրել Ադանայում, հեռագրեց Սսում գտնվող ուժերին՝ իրենց օրինակին հետեւելու կոչով։

⁶¹ Անդ, էջ 546։

⁶² Վերջիններս, ինչպես նաեւ մյուլթեսարիֆ Մուհարրեմ բեյը հետագայում պաշտոնազրկվեցին եւ մահապատժի ենթարկվեցին քեմալականների կողմից։

⁶³ Տէս Հ. ՍԻՄՈՆՅԱՆ, նշվ. աշխ., էջ 145։

⁶⁴ Տէս անդ, 145։

Սսի զինվորական վարչությունը, հրամանին հնազանդ, գրավեց բերդը եւ թնդանոթներն ուղղեց քաղաքի վրա: Դրությունը դարձավ սպառնալից: Ղեւոնդ եւ Գյուլտ վարդապետները դիմադրության աննկուն պատրաստակամությամբ տագնապալի գիշեր անցկացրին՝ կազմակերպելով նոր ջոկատներ ու փորելով նոր խրամատներ: Զաբել Նսայանը, խոսելով Սսում տիրող խիստ ընկճված տրամադրության մասին, միաժամանակ դրվատում է սսեցիներին կազմակերպվածության համար⁶⁵:

Այսպիսին էր իրավիճակը Սսում, երբ բացվեց ապրիլի 15-ի առավոտը եւ զարմանալիորեն պարզվեց, որ Կ. Պոլսում դարձյալ հեղաշրջում է տեղի ունեցել եւ կրկին իշխանության եկած երիտթուրքերը հրաման էին ուղարկել անմիջապես դադարեցնել կոտորածները: Այսպիսով՝ երջանիկ պատահականությամբ քաղաքը զերծ մնաց կոտորածից:

Սսի դեպքերից անմիջապես հետո Սահակ Բ. Խապայանը ջարդին մասնակցած թուրք զինվորականների ուղեկցությամբ ուղևորվում է Ադանա: Ճանապարհին ականատես լինելով կոտորածների սարսափներին, տեսնելով անթաղ մնացած հազարավոր հայերի դիակները, հրկիզված հայկական գյուղերը եւ Ադանայի ավերակները՝ նրա հոգին փոթորկվում է⁶⁶:

Կիլիկիայի որոշ շրջաններ զերծ մնացին կոտորածներից հայ հոգեւորականության աչալրջության, խոհեմության, ինչ-որ առումով նաեւ սպառնալիքների արդյունքում: Այսպես՝ հաճնցիները ոչ միայն ինքնապաշտպանվեցին եւ թույլ չտվեցին 10 000 հոգուց բաղկացած «խուժանին» մտնել քաղաք եւ կոտորել Հաճընի հայությանը, այլ նաեւ փրկեցին Սսի հայությունը: Այսպես՝ Ներսես եպս. Դանիելյանը մի սպառնալից հեռագիր ուղարկեց Սսի մյուսթասարիֆին՝ հայտնելով, որ «եթէ վտանգէք Սիսի հայերը, 500 ձիաւորով պատրաստ եմ հասնելու Սիս եւ քարքարի վրայ չձգելու...»⁶⁷:

Ըստ մեկ այլ տեղեկության՝ խոսքը հաճնցի եւ զեյթունցի այն քաղերի մասին էր, որոնք պատրաստվում էին արշավել մինչեւ Ադանա: Խուճապի մատնված մյուսթասարիֆն իսկույն միջոցներ ձեռնարկեց եւ Ղարսպազարի հայությունը կարողացավ Զին Թորոսի ղեկավարությամբ բարեհաջող նահանջել դեպի Սիս⁶⁸:

⁶⁵ Տէս Զ. ՆՍԱՅԵԱՆ, Աւերակներուն մէջ [Վկայագրութիւն], Ստանպուլ, 2012, էջ 192:

⁶⁶ Տէս ԲԱՐԳԷՆ Ա. ԱԹՈՌԱԿԻՑ ԿԱԹՈՂԻԿՈՍ ՄԵԾԻ ՏԱՆՆ ԿԻԼԻԿԻՈՅ, Պատմութիւն կաթողիկոսաց Կիլիկիոյ (1441էն մինչեւ մեր օրերը)», Անթիլիաս, 1990, էջ 910:

⁶⁷ «Ցեղասպանութենէն վերապրող Հաճընի հպարտ գաւաի Ասատուր Զալեանի յուշերը», Լոս Անջելես, 2015, էջ 116:

⁶⁸ Տէս Գ. ԹԱԹՈՒԼԵԱՆ, Անթեղուած գաղտնիքներ, Պէյրուս, 1967, էջ 204—05:

Լինում էին դեպքեր, երբ հայ հոգեւորականները հայերին փրկելու համար օգտագործում էին «մէկ հայ՝ մէկ ոսկի» միջոցը: Դեպքերի ականատես-վերապրող Արուսյակ Վանեսյանը (ծնվ. 1909 թ.) վկայում է, որ Ադանայի ջարդերի ժամանակ, երբ ժողովրդի մի մասը պատսպարվել էր եկեղեցում, Թոքատի կաթոլիկ սրբազանը ոսկու քսակը ձեռքին գալիս է, ամեն հայի կյանքի համար մեկ-մեկ ոսկի տալիս, ազատում⁶⁹:

Ջարդերի պատճառը քննելու համար կազմվեց պատերազմական ատյան՝ կոտորածից փրկված անմեղ հայերին դատելու համար: Դեպքերի ականատես հույն հայտնի վաճառական Մավրոմատին 1909 թ. սեպտեմբերի 8 (21)-ին հաստատում էր, որ քրիստոնյաները դատարանում գործը տանուլ էին տալիս եւ կախաղանի արժանի համարվում, եթե նրա հակառակորդը մահմեդական էր⁷⁰:

Կոտորածներից հետո հալածանքներ սկսեցին նաեւ հայ հոգեւորականութան նկատմամբ: Կ. Պոլսի պատրիարք Եղիշե Դուրյանը 1909 թ. դեկտեմբերի 31-ի իր նամակում՝ ուղղված Մատթեոս Բ. Կոստանդնուպոլսեցի Ամենայն Հայոց հայրապետին (1908–1910 թթ.) տեղեկացնում էր, որ Ադանայի պատերազմական ատյանները բանտարկում եւ դատապարտում են նույնիսկ եկեղեցականներին⁷¹: Ազգային գործիչների հետ բանտարկվեցին նաեւ Զեյթունի առաջնորդ Վաղարշակ վրդ. Արշակունին, Հաճընի առաջնորդ Ներսես վրդ. Դանիելյանը (իբրեւ «գրգռիչ ատենախօսութիւններ ընող»⁷²) եւ Դյորտ-Յոլի առաջնորդական փոխանորդ Սահակ քահանան՝ լոկ այն բանի համար, որ հանդգնել էին պայմանավորվածություն ձեռք բերել Զեյթունի, Հաճընի, Չոք-Մարզվանի եւ լեռնային մյուս շրջանների մահմեդական ազգաբնակչության հետ՝ հայկական գյուղերին վնաս չհասցնելու վերաբերյալ⁷³: Ձերբակալության առնչությամբ Սահակ Բ. Խապայանն իր դժգոհությունն ու բողոքն է հայտնում իշխանություններին՝ նրանց կշտամբելով, որ եթե հոգեւորականներն «ըմբոստ եւ ժողովուրդը ապստամբեցնող են, ուրեմն կը նշանակէ թէ ես ալ ապստամբապետ մըն եմ... Ուստի, թող ինձմէ առնուի կայսերական ֆերմանը եւ ես ալ դատուիմ իբր ըմբոստ...»⁷⁴: Կաթողիկոսի դժգոհությունը տալիս է իր արդյունքը, եւ հոգեւորականներն ազատ են արձակվում:

⁶⁹ Տէս Վ. ՍՎԱԶԼԵԱՆ, նշվ. աշխ., էջ 436:

⁷⁰ Տէս «Геноцид армян в Османской империи», «Сборник документов и материалов», էջ 205:

⁷¹ Տէս ՀԱԱ, ֆ. 57, ց. 5, գ. 14, թ. 2:

⁷² Տէս ՀԱԱ, ֆ. 57, ց. 5, գ. 14, թ. 8 շրջ.:

⁷³ Տէս ՀԱԱ, ֆ. 57, ց. 2, գ. 68, թ. 9:

⁷⁴ «Ատանայի հայոց պատմութիւն», էջ 305:

Ի վերջո, «վստահությունը» եւ «արդարությունը» վերականգնելու ակնկալիքով՝ երիտթուրքերը ձերբակալեցին կոտորածներին մասնակցած 200 թուրքի, որոնցից 9-ին կախաղան բարձրացրին: 1912 թ. բանտարկվածներից միայն 86-ն էին մնացել բանտում, որոնք շուտով ներման արժանացան⁷⁵:

1909 թ. զարհուրելի իրադարձությունները ծանր հետեւանքներ թողեցին կոտորածներից մի կերպ փրկված հայ հոգեւորականության կյանքում, քանի որ նրանցից շատերը հայտնվել էին նյութական ծանր վիճակում: Հոգեւորականությանն օժանդակելու խնդրին էր միտված Սահակ Բ. կաթողիկոսի՝ Ամենայն Հայոց հայրապետ Մատթեոս Բ. Կոստանդնուպոլսեցուն ուղղված 1909 թ. նոյեմբերի 22-ի թիվ 2435 նամակը⁷⁶:

Կոտորածների հետեւանքով կիլիկիահայությունը կանգնեց նաեւ բռնի կրոնափոխության եւ ազգային ուժացման վտանգի առջեւ: Քիչ չէին դեպքերը, երբ թուրքերը կրոնափոխության դիմաց խոստանում էին փրկություն, սակայն դրժում էին իրենց խոստումը եւ կոտորում հայերին: Այդ առումով հատկանշական է Խառնիի սպանված հայ քահանայի՝ ջարդերից մազապուրծ եղած կնոջ նամակի այն հատվածը, որը վերաբերում է բռնի կրոնափոխության խնդրին: Այդ մասին նա նշում է. «Թուրքերը գտած ըլլալով մեր պատսպարուած վայրը, մեզմէ դրամ պահանջեցին: Այնուհետեւ մեզի ազդարարեցին ուրանալ մեր կրօնքը՝ թուրք դարձնելու համար... Տուգճեանը եւ որդին՝ Սամուէլը, աղայի մը առաջարկեցին 80 թրքական ոսկի՝ որպէս կեանքի փրկագին: Թուրքը դրամը առաւ եւ զիրենք երկու օր հիւրընկալեց, յետոյ փորձեց զանոնք կրօնափոխ դարձնել: Երբ անոնք մերժեցին, սպանեց զիրենք: Նոյն պարագաներու տակ Յակոբեանը եւ իր որդին՝ Աւետիսը, ունեցան նոյն ճակատագիրը...»⁷⁷:

Բնակչության ուժացման խնդրին ուներ կենսական նշանակություն. Կ. Պոլսի Հայոց միացյալ ընկերության ժողովի ատենապետ Հովակիմյանը Մատթեոս Բ. Կոստանդնուպոլսեցուն ուղղված 1909 թ. հոկտեմբերի 22-ի իր նամակում նշում էր, որ Կիլիկիայում «տասը հազարի մօտ ժողովուրդ ուժանալու վրայ է իր Եկեղեցիէն եւ անխուսափելի կորստեան սահմանուած է...»⁷⁸:

⁷⁵ Տէն ԲԱՐԳԷՆ Ա. ԱԹՈՌԱԿԻՑ ԿԱԹՈՂԻԿՈՍ, նշ. աշխ., էջ 910:

⁷⁶ Տէն ՀԱԱ, ֆ. 57, ց. 2, գ. 1850, թ. 2, շրջ. 3:

⁷⁷ ՎԵՐ. ԱՐ. ԱՐԱԳԵԱՆ, Վկայագրություն հալածքի ծառայական ճանապարհորդութեան մը Հասանալէլիէն (Կիլիկիա) Սառնիա (Գանատա), Պէլլոսթ, 2010, էջ 341–342:

⁷⁸ ՀԱԱ, ֆ. 57, ց. 2, գ. 1850, թ. 5:

Այսպիսով, ինչպես կարող ենք տեսնել այլազան նյութերի եւ վավերագրերի համադրությունից, Մեծի Տանն Կիլիկիո կաթողիկոսությունը 1909 թ. մեծ դժվարությամբ մաքառեց ու վերապրեց կոտորածների, բռնությունների եւ հալածանքների ահասարսուռ մի ժամանակաշրջան, որն ուղեկցվում էր մահմեդական անհանդուրժողականության եւ կրոնական մոլեռանդության բացահայտ դրսևորումներով:

РЕЗЮМЕ

В статье рассматриваются исторические события конца 19-го и начала 20-го вв., с помощью которых описывается общая политико-экономическая ситуация в Армянской Киликии, где в начале 1909 года турецкое правительство организовало массовую резню армянского населения. Опираясь на архивные материалы, а так же используя сведения периодической печати того времени и свидетельства очевидцев, автор составляет по возможности всеобъемлющий образ драматических событий, свои выводы и заключения, сопоставляя с общепринятыми научными подходами по данному вопросу.

SUMMARY

The article examines the historical events of the late 19th and early 20th centuries, which helped to restore the general political and economic situation in Armenian Cilicia, where at the beginning of 1909 the Turkish government organized the massacre of the Armenian population. Based on archive materials, as well as using information from periodicals of that period and eyewitness accounts, the author draws up a comprehensive image of those dramatic events making his own conclusions in accordance with scientifically accepted approaches on this issue.

